

Ed.

660. Frumvarp til laga

[186. mál]

um eyðingu refa og minka.

(Eftir 3. umr. í Nd.)

I. KAFLI
Yfirumsjón.

1. gr.

Landbúnaðarráðuneytið skal hafa yfirumsjón með útrýmingu refa og minka.

2. gr.

Sýslunefndir skulu sjá um, að hreppsnefndir annast eyðingu refa og villiminka. Heimilt er sýslunefnd að ráða í samráði við hreppsnefndir einn mann (refaeyðingarstjóra) til að stjórna refa- og minkaveiðum í allri sýslunni eða nokkrum hluta hennar.

II. KAFLI
Eyðing refa.

3. gr.

Sérhver hreppsnefnd skal á hverju vori annast um grenjaleitir og grenjavinnslu í heima- og afréttarlöndum hreppsins, hvort sem lönd þessi liggja utan eða innan sýslufélagsins. Þar, sem tveir eða fleiri hreppar eiga afréttarlönd saman, annast þeir grenjaleitir í sameiningu. Ef unnt er, skal skotmaður eða skotmenn annast grenjaleit, þar sem því verður við komið.

4. gr.

Hreppsnefnd, stjórn upprekstrarfélags (eða refaeyðingarstjóri, þar sem hann er, sbr. 2. gr.) skal ráða skotmann, einn eða fleiri, til að vinna greni í þeim löndum, sem þeim ber að annast um í þessu efni. Skulu skotmenn reiðubúnir til grenjavinnslu hvenær sem greni finnst. Vökumaður, sem skotmaður tekur gildan, skal ráðinn af sama aðila.

5. gr.

Óheimilt er öðrum en þeim, sem til þess eru ráðnir samkvæmt 4. gr., að vinna greni eða taka yrðlinga, nema svo hafi staðið á, að ekki hafi náðst til skotmanns í tæka tíð.

6. gr.

Þegar greni finnst, hvort heldur í grenjaleit eða ekki, skal það ekki yfirgefið, ef kostur er. En finni það einn maður og geti ekki komið vitneskju til næsta bæjar nema fara sjálfur, skal hann hraða sem mest för sinni. Skotmanni skal síðan gert aðvart tafarlaust.

7. gr.

Borgun til skotmanns og vökumanns fer eftir því, sem um semst við hreppsnefnd eða þann aðila, sem sér um grenjavinnslu. Heimilt er að semja um verðlaun fyrir unnin dýr, en taka skal tillit til þess, þegar ráðningarkjör skotmanns eru ákveðin. Einnig skal taka tillit til þess við launaákvörðun, ef yrðlingar eru verðmætir.

8. gr.

Nú vinnast hlaupadýr, og á þá sá, er vinnur, 100 kr. sem verðlaun fyrir hvert dýr, er hann sannar fyrir oddvita að hafa unnið.

9. gr.

Hreppsnefnd heldur skrá yfir öll þekkt greni og gerir stutta lýsingu á þeim. Hún skal láta byggja vörður og skotbyrgi við greni, þar sem þörf er á, og halda þeim við. Hún getur látið laga skemmd greni, sem auðunnin eru, en ónýta önnur, sem forunnin eru.

10. gr.

Skylt er að eitra fyrir refi minnst þriðja hvert ár í afréttum og heimalöndum, sem notuð eru sem afrétt, þó eigi nær bæjum en 5 km. Oddvitar skulu sjá um eitrunina, hver á sínu svæði, og þar sem fleiri hreppar eiga afréttarlönd saman, skulu hlutaðeigandi oddvitar hafa samráð um eitrunina. Oddviti skal framkvæma eitrunina sjálfur eða fá til þess mann, sem hann treystir. Héraðslæknir skal láta refa- eitur af hendi við oddvita í samráði við sýslumann.

III. KAFLI

Útrýming minka.

11. gr.

Sérstakar ráðstafanir skulu gerðar til útrýmingar villminka.

12. gr.

Skylt er hreppsnefndum á þeim svæðum, þar sem vart hefur orðið villiminka, að gera skýrslur um útbreiðslu þeirra og dvalarstaði, eftir því sem unnt er. Skýrslur þessar sendir hreppsnefnd hlutaðeigandi sýslumanni.

13. gr.

Sýslumaður ákveður, að fram fari að minnsta kosti tvisvar á ári, að vetrar- og vorlagi, allsherjar útrýming á þeim svæðum í lögsagnarumdæminu, þar sem villiminka hefur orðið vart.

Sýslumaður ákveður hverju sinni, hvenær útrýming skuli fram fara.

14. gr.

Hreppsnefnd sér um framkvæmd útrýmingarinnar eftir fyrirlagi sýslumanns.

15. gr.

Nú verður vart villiminka, eftir að allsherjar útrýming fór fram, og er hreppsnefnd þá skylt að ráða einn eða fleiri menn til útrýmingar dýranna.

16. gr.

Nú vinna menn villiminka, án þess að þeir hafi verið ráðnir til þess, og skulu þeir þá fá verðlaun úr ríkissjóði, allt að 60 kr. fyrir hvert dýr, sem unnið er, og hefur oddviti á hendi greiðslu verðlaunanna.

17. gr.

Skýlt er mönnum að hlíta fyrir mælum hreppsnefndar um útrýmingu villiminka, enda fái þeir greiðslu úr ríkissjóði fyrir starfa sinn samkvæmt ákvæðum reglugerðar, er landbúnaðarráðuneytið setur. Auk þeirrar greiðslu, er hér um ræðir, skulu menn þessir, þegar þeir vinna að útrýmingu á vegum hreppsnefndar, fá hálf verðlaun samkvæmt ákvæðum 16. gr. fyrir hvert dýr, sem þeir vinna.

IV. KAFLI

Bann gegn minka- og refaeldi.

18. gr.

Sýslunefndir og bæjarstjórnir geta bannað minkaeldi í umdæmum sínum og sömuleiðis eldi refa. Verði slíkt bann framkvæmt þar, sem nú eru loðdýrabú, skal sýslusjóður eða bæjarsjóður greiða eigendum skaðabætur samkvæmt mati þriggja dómkvaddra manna.

V. KAFLI

Skipting kostnaðar.

19. gr.

Hreppsnefndir eða þeir, sem falið hefur verið að sjá um refaveiðar, skulu samhliða hreppsreikningi ár hvert hafa tilbúna reikninga yfir kostnað við starfsemi þessa, er séu í samræmi við samninga, er gerðir hafa verið við þá aðila, sem störfin hafa leyst af hendi.

Allan kostnað, sem leiðir af refaveiðum, þar með talin grenjaleit og verðlaun fyrir unna refi, skal greiða úr hlutaðeigandi hreppssjóði eða fjallskilasjóði, eða sameiginlega úr fleiri hreppssjóðum eða fjallskilasjóðum, ef þannig stendur á, sbr. 3. gr.

Alla slíka reikninga skal leggja fyrir næsta sýslufund til úrskurðar. Nú úrskurðar sýslunefnd, að reikningarnir séu réttir og ekki úr hófi háir. Skal þá endurgreiða hreppsfélögum þannig, að ríkissjóður greiði $\frac{1}{3}$ kostnaðar og sýslusjóður $\frac{1}{3}$.

VI. KAFLI

Almenn ákvæði.

20. gr.

Landbúnaðarráðuneytið setur reglugerð um nánari framkvæmd III. kafla laga þessara, svo og hverra sannana beri að krefjast fyrir drápi villiminka, til þess að verðlaun skuli veitt.

Einnig skal ráðherra setja reglugerð um framkvæmd eitrunar fyrir refi og minka og um meðferð refaeiturs, sbr. 10. gr.

Enn fremur getur ráðherra sett reglugerð um önnur atriði varðandi refaeyðingar, eftir tillögum sýslunefnda.

21. gr.

Brot gegn lögum þessum og reglugerðum, sem settar verða samkvæmt þeim, varða sektum, 200—5000 kr., nema þyngri refsing liggi við samkvæmt öðrum lögum.

22. gr.

Með lögum þessum eru úr gildi númer lög nr. 108 11. ágúst 1933, svo og önnur lagaákvæði, sem koma í bága við þessi lög.

23. gr.

Lög þessi öðlast þegar gildi.